

Live for di Cas di Cultura atraves di Tele Aruba..

PREMIO PADU DEL CARIBE RIBA SU FECHA NATAL LO BAY PARALIZA ARUBA..

Texto y foto:Poets

DEN AMBIENTE

** Porfin mayan diadomingo for di 6'or di atardi, Aruba lo bay goza di e magno PREMIO PADU DEL CARIBE, cual lo ser transmiti live pa Tele Aruba canal 13. Por a compronde cu for di 5'or di atardi caba Tele Aruba lo cuminsa manda su señalnan y lo cubri e yegadanan di e artistanan.

Ya caba ta na Aruba e multi talentoso musico Chichi Peralta, kende lo bay ricibi e premio como e orquesta Caribeño mas destaca durante aña 1997. For di Curacao Lo ta presente e integrantenan di "The Three Voices" kendenan lo ricibi un homenaje y tambe Anna Thode for di Boneiro lo ricibi un homenaje.

E virtuoso pianista Curasoleño Norman Moron gran amigo di Padu del Caribe tambe lo ta presente pa duna su presentacion riba piano, mientras cu por spera un presentacion

tambe di Padu del Caribe.

E aña aki PREMIO PADU DEL CARIBE lo rindi un homenaje special na nos orguyo TRIO HUASTECA, kendenan sin duda lo bay trece gratonan inolvidable durante nan presentacion. Tambe lo bay tin premionan di merito na diferente personahenan cu a contribui engrande na bienestar di nos cultura musical, cualnan lo keda como un sorpresa.

Interesante sigur lo bay ta na unda cada nominado den e categoria di cantante di aña, lo bay duna nan presentacion acompaña pa nan banda musical y na final lo anucia e ganador.

E prome entrega oficial di PREMIO PADU DEL CARIBE '97, lo bay keda como uno historico, ya cu esaki ta ser realiza riba e fecha natal di nos querido Tata di Cultura, Padu del Caribe. Pa ocasion historico aki, Standing Ovation kendenan tin e produccion na nan encargo, a prepara

cinco cambio di escenario den un toke colorido hamas visto, cual lo bay haci e anochi aki uno super espectacular.

Esaki lo bay ta un bunita regalo pa Padu del Caribe y no lo tin duda cu henter


pueblo di Aruba lo bay sinti nan sumamente orgyoso cu porfin nos artistanan a haya un premiacion di halto nivel y caliber.

DEN AMBIENTE ta desea tur e nominadonan hopi exito y un PABIEN grandi

na nos Tata di Cultura, Padu del Caribe, y cu bon Dios lo drama su Bendicion pa asina nos por tin Padu del Caribe pa hopi aña mas hunto cu nos durante su prestigioso PREMIO PADU DEL CARIBE..




**** Padu del Caribe y su musiconan ta cla pa pone Cas di Cultura tembla mayan anochi durante e magno PREMIO PADU DEL CARIBE.**



**** Aña pasa DEN AMBIENTE AWARDS a rindi homage na e gran cantante Johnny Ventura, kende a ricibi e maximo galardón PREMIO PADU DEL CARIBE..**

CHICHI PERALTA A YEGA ARUBA PA RICIBI SU "PREMIO PADU DEL CARIBE"..



** Ayeratardi e multi talentoso percusionista CHICHI PERALTA a yega Aruba pa ta presente den e magno PREMIO PADU DEL CARIBE. Chichi Peralta kende ta director musical di su propio orquesta CHICHI PERALTA Y SON FAMILIA, cual orquesta nos orguyo musico Hildward Croes ta formando parti a ser eschih pa PREMIO PADU

DEL CARIBE como e orquesta cu mas a sobresali durante aña 1997. Chichi Peralta a yega Aruba sumamente contento den compania di su manager Salvador Urdanavia, su dos cantantenan Yandy Feliz y Rene Geraldino, mientras cu awetardi Fernando Beltran kende ta propietario di e potencial Caiman Records lo yega

Aruba pa ta presente durante e prestigioso PREMIO PADU DEL CARIBE'97.

Na Aeropuerto Internacional Reina Beatrix tabata presente pa ricibi Chichi Peralta, Padu del Caribe, Hildward Croes, Gigliola Koolman di Standing Ovation y tambe Dj Erin Croes di Magic 96.5, kende a realiza e yegada aki live pa su prestigioso radio emisora..